

摘藻堂四庫全書薈要

集部

欽定四庫全書薈要

集部

宋詩鈔卷六十五

六



詳校官候選知縣臣吳向華

欽定四庫全書薈要卷二萬三百十八

集部

宋詩鈔卷六十五

內閣中書舍人吳之振編

陸游劔南詩鈔二

疏圃

山翁老學圃自笑一何愚
礲瘠財三畝勤劬賴兩奴
正

方畦畫局微潤土融酥
剪闢荆榛盡鉏犁磊塊無
過溝

橫略約聚斃起浮屠

拾園中瓦礲作小埕

隙地成瓜援餘功及芋

區如絲細生菜似鴨爛蒸壺此事今真辦東歸不為鱸
累日無酒亦不肉食戲作此詩

小築精廬剡曲傍
枵然蟬腹與龜腸
酒錢覓處無司業
齋日多來似太常
雲碓旋舂菰米滑
風爐親候藥苗香
明年更入南山去
要試囊中服玉方

陶山遇雪覺林遷
菴主見招不果往

山中大雪二尺彊
道邊虎迹如椀大
衰翁畏虎復畏寒
招喚不來公勿怪
梨花開時好風日
走馬尋公作寒食

不須沽酒飲陶潛
箭筍蕨芽如蜜甜

夏夜舟中聞水鳥聲甚哀若曰姑惡感而作詩

女生藏深閨未省窺牆藩
上車移所天父母為它門
妾身雖甚愚亦知君姑尊
下牀頭雞鳴梳髻著襦裙
堂上奉灑掃厨中具盤飧
青青摘葵莧恨不美熊蹯
姑色少不怡衣袂溼淚痕
所冀妾生男庶幾姑弄孫
此志竟蹉跎薄命來讒言
放棄不敢怨所悲孤大恩
古路傍陂澤微雨鬼火昏
君聽姑惡聲無乃遣婦魂

雨夜

急雨如河瀉瓦溝空堂卧對一燈幽老雞多事彊知曉
落葉無情先報秋身未蓋棺誰可料尊常有酒莫閒愁
功名老大從來事且復長歌起飯牛

鄰曲小飲

早稻喜登塲相呼集野堂迎霜新兔美近社濁醪香
屋滴殘雨竹籬圍夕陽新豐不須作真箇是吾鄉

題酒家壁

明主何曾棄不才書生飄泊自堪哀
煙波東盡江湖遠雲棧西從隴蜀回
宿雨送寒秋欲晚積衰成病老初來
酒香孤脆丹楓岸強遣樽前笑口開

幽居書事

莫嘆人間苦不諧清時有味是歸來
已因積毀成高卧更借佯狂護散才
正欲清言聞客至偶思小飲報花開
紛紛爭奪成何事白骨生苔但可哀

紹興中與陳魯山王季夷從兄仲高以重九日同

遊禹廟後三十餘年自三橋泛舟歸山居秋高
雨霽望禹廟樓殿重複光景宛如當時而三人
者皆下世子亦衰病無聊慨然作此詩

重樓傑閣倚虛空紅日蒼煙正鬱蔥鄉國歸來渾似鶴
交朋零落不成龍人生真與夢何校我輩故應情所鍾
淚漬清詩却回棹不眠一夜聽鳴蛩

過村店有感

細篋絡丹柿枯籬懸碧花炊煙生旅竈野水漱寒沙棲

鳥爭投樹歸牛自識家恍然遊蜀路搔首憶天涯

骨相

骨相元知薄功名敢自期病侵彊健日間過聖明時形
勝輪臺地飛騰瀚海師江湖雖萬里猶擬掇聲詩

薏苡

蜀人謂其實為薏
米唐安所出尤奇

初遊唐安飯薏米炊成不減雕胡美大如芡實白如玉
滑欲流匙香滿屋腹腴項鬻不入盤况復飡酪誇甘酸
東歸思之未易得每以問人人不識嗚呼奇才從古棄

艸管君試求之離落間

鄉人或病予詩多道蜀中遨樂之盛適春日遊鏡
湖共請賦山陰風物遂卽杯酒間作絕句當持
以誇西州故人也

嬾日輕雲淡沲天撲燈過後賣花前便從水閣杭湖去
捲起朱簾上畫船

舫子窗扉面面開金壺桃杏間尊罍東風忽送笙歌近
一片樓臺泛水來

病中

風雨暗江天，幽窗起復眠。
忍窮安晚境，留病壓災年。
客助脩琴料，僧分買藥錢。
餘生均逆旅，未死且陶然。

初夏游凌氏小園

水滿池塘葉滿枝，曲廊危榭愜幽期。
風和海燕分泥處，日永吳蠶上簇時。
閒理阮咸尋舊譜，細傾白墮賦新詩。
從來夏淺勝春日，兒女紛紛豈得知。

庾信詩云夏淺却勝春
競湖遊人至

立夏而止

賽神曲

叢祠千載臨江渚拜貺今年那可數
須晴得晴雨得雨人意所向神輒許
嘉禾九穗持上府廟前女巫遞歌舞
鳴唱歌謳坎坎鼓香煙成雲神降語
大餅如槃牲腍肥再拜獻神神不違
晚來人醉相扶歸蟬聲滿廟鎖斜暉

秋夜

老病龍鍾不入城濁醪麤飯餞餘生
未霜村舍秋先冷無月江邊夜自明
出塞雖慙平敵手下帷聊喜讀書聲

山童睡熟青燈暗自撥殘爐候藥鎔

得所親廣州書

音信連年恨不聞書來細讀却消魂人稀野店山魃語
路僻蠻村荔子繁毒草自搖春寂寂瘴雲不動晝昏昏
此生相見應無日且置清愁近一樽

西路口山店

日薄霜清十月天馬蹄聲裏送流年店當古路三叉處
山似孤雲兩角邊

孤雲兩角
在漢中

淹泊自悲窮不醒衰殘更

覺病相纏榆關瀚海知何在目送飛鴻入暮煙

冬夜與溥菴主說川食戲作

唐安薏米白如玉漢嘉枬脯美勝肉大巢初生蚕正浴
小巢漸老麥米熟龍鶴作羹香出釜木魚瀹菹子盈腹
未論索麤與鑽飯最愛紅糟并羹粥東來坐閱七寒暑
未嘗舉箸忘吾蜀何時一飽與子同更煎土茗浮甘菊

野飲

青山千載老英雄濁酒三盃失阮窮訪古顏垣荒塹裏

覓交屠狗賣漿中
平堤漸放春蕪綠
細浪遙翻夕照紅
已把殘年付天地
騎牛吹笛伴村童

春晚至山中因訪陳道人

一春衰病集殘骸
太息流塵覆酒杯
僧鉢始知尊菜老
佛瓶初見杏花開
蘋溪小雨成幽討
松院斜陽又獨來
不為愛閒從野叟
年來萬事學低摧

病起

山村病起帽圍寬
春盡江南尚薄寒
志士淒涼閒處老

名花零落雨中看，斷香漠漠便支枕。
芳草離離悔倚闌，收拾吟牋停酒椀。
年來觸事動憂端。

芒種後經旬無日不雨偶得長句

芒種初過雨及時，紗厨睡起角巾欹。
癡雲不散常遮塢，野水無聲自入池。
綠樹晚涼鳩語鬧，畫梁晝寂燕歸遲。
閒身自喜渾無事，衣覆熏籠獨誦詩。

秋夜泊舟亭山下

逢水逢山到處留，可憐身世寄孤舟。
一汀蘋露漁村晚。

十里荷花野店秋，羽檄未聞傳塞外。
金椎先報擊衙頭。
開北主行帳為壯士所攻幾不免北語大酋所在為衙頭
煌煌太白高千丈，那得功

名取次休

初秋山中作

萬里西風吹幅巾，即今真箇是閒人。
堆盤菱熟燕脂角，藉藻鱸新淡墨鱗。
姥嶺蹇驢尋雪徑，娥江孤艇繫煙津。
飄然樂事真當勉，遠付十年無此身。

臨安春雨初霽

世味年來薄似紗，誰令騎馬客京華。
小樓一夜聽春雨，深巷明朝賣杏花。
矮紙斜行閒作草，晴窗細乳戲分茶。
素衣莫起風塵歎，猶及清明可到家。

飲張功父園戲題扇上

寒食清明數日中，西園春事又匆匆。
梅花自避新桃李，不為高樓一笛風。

聞傅氏莊紫笑花開急棹小舟觀之

日長無奈清愁處，醉裏來尋紫笑香。
漫道閒人無一事，

逢春也似蜜蜂忙

鹹齏十韻

九月十月屋瓦霜家人共畏畦蔬黃小甕大甕盛滌濯
青松綠韭謹蓄藏天氣初寒手訣妙吳鹽正白山泉香
挾書旁觀穉子喜洗刀竭作厨人忙園丁無事卧曝日
棄葉狼籍堆空廊泥為緘封糠作火守護不敢非時嘗
人生各自有貴賤百花開時促高宴劉伶病醒相如渴
長魚大肉何由薦凍齏此際價千金不數狐泉槐葉麵

摩挲便腹一欣然作歌聊續冰壺傳

遣興

莫羨朝回帶萬釘吾曹要可草堂靈風來弱柳搖官綠
雲破奇峰湧帝青聽盡啼鶯春欲去驚回夢蝶醉初醒
從教俗眼憎疎放行矣桐江醉客星

小憩村舍

藤梢維艇子煙際覓人家小婦簪新麥羣童摘晚茶溪
雲易成雨崖樹少開花聊寄平生快青鞵到若耶

雨後

礎潤還成雨雲收旋作晴巖花分日發林筍逐番生
硯行常具軒窗晚更明塵埃不到那得廢詩情

自上竈過陶山

宿雨初收見夕陽縱橫流水入陂塘
蚕家忌客門門閉茶戶供官處處忙
綠樹村邊停醉帽紫藤架底倚胡牀
不因蕭散遺塵事那覺人間白日長

排悶

老去知心少流塵鎖斷絃尊空問字酒囊罄作碑錢掃
葉供朝爨和泥補漏船胸中元浩浩白眼望青天

題三壁

二十餘年此結茆園公谿父日論交風翻半浦亂荷背
雨放一林新笋梢隔葉晚鶯啼谷口啞花雛鳴聚塘坳
出門行罷還無事借得丹經手自抄

拜旦表

一封馳奏效嵩呼清蹕何時返故都只道建炎巡狩禮

誰知故事自祥符

安流亭俟客不至獨坐成詠

憶昔西征鬢未霜
拾遺陳迹弔微茫
蜀江春水千帆落
禹廟空山百草香
馬影斜陽經劒閣
鵲聲清曉下瞿唐
酒徒雲散無消息
水榭憑欄淚數行

歲晚書懷

早見龍翔上太清

紹興末游
官玉牒所

即今孤宦老山城
靈丹不

解換凡骨薄命枉教生
太平積雪樓臺增壯觀
近春鳥

雀有和聲如山吏牘何時了惆悵西窗晚照明

雪中忽起從戎之興戲作

狐裘卧載錦駝車酒醒冰髭結亂珠三尺馬鞭裝白玉
雪中畫字草軍書

驚堂春夜

南樓統統下疎更一點紗籠滿院明映月疎梅入簾影
讀書穉子隔窗聲呻吟藥裹身寧久汎掃風塵意未平
草檄北征今二紀山城仍是老書生

游嘗為丞相陳魯
公史樞相張魏公

草中原及西夏

書機於都堂

東竺偶書

華髮蕭蕭不滿簪，強扶衰病著朝衫。
寒廳靜似阿蘭若，佳客少于優鉢曇。
詩酒放懷窮亦樂，文移肆罵老難堪。

棄官若遂飄然計，不死揚州死劔南。

顧況詩云：人生只合揚州死，而余嘗

有歸蜀

之意

倚欄

閒岸紗巾小倚欄，吳中三月尚春寒。
蜂脾蜜滿花初過，

燕腎泥新雨未乾老厭簿書思屏迹病逢節物強追歡
一樽又動流年感城上斜陽畫角殘

晚春園中作

少逢春歸未解悲千篇曾賦傷春詩可堪霜點鬢鬚後
更值綠暗園林時楊花輕墮簷外影杏子重壓闌邊枝
毬塲立馬漏聲靜綺窗語燕簷陰移向來春事渺何許
長空鳥跡何由追鞦韆未拆已寂寞日暮東風吹綵旗

九月初郊行

九月吳中尚挾衣江郊策馬踏斜暉
薔花漫漫連山路
豆筴離離映版扉
蒼兔避鷹投磔去
黃鶻脫網傍人飛
農家光景關心事
不為無才也合歸

寄題朱元晦武夷精舍

先生結屋綠巖邊
讀易懸知屢絕編
不用采芝驚世俗
恐人謗道是神仙

蟬蛻巖間果是無
世人妄想可憐渠
有方為子換凡骨
來讀晦菴新著書

身閒剩覺溪山好
心靜尤知日月長
天下蒼生未蘇息
憂公遂與世相忘

齊民本自樂衡門
水旱那知不自存
聖主憂勤常旰食
煩公一一報曾孫

山如嵩少三十六
水似邛邛九折途
我老正須閒處著
白雲一半肯分無

秋郊有懷

檐頭買雙兔
市店取斗酒
還家埽北窗
歡言酌親友
家

貧氣未餒禮薄情更厚高啗金石裂健筆龍蛇走酒闌
起出門孤月挂衰柳大笑各散歸吾輩可不朽官身縛
簡書此樂寧復有悵望會稽雲憑高一搔首

楚人固多孱妄謂秋可悲寧知河嶽間氣俗樂此時壯
士鳴雕弓健馬嚼枯萁日馳三百里榆關赴戰期陣雲
壓龍庭殺氣搖參旗熾火燎狐兔倒瀉黃金卮勒銘燕
然石千載鎮荒陲安能空山裏凍研哦清詩

秋山瘦益奇秋水淺可涉出城西風勁拂帽吹脫葉新

霜拆栗罇宿雨飽豆莢枯柳無鳴蜩寒花有穿蝶郊行
得幽曠頗覺耳目愜斷雲北山來欣然與之接挂冠易
事爾看鏡歎勛業永懷桑乾河夜渡擁馬鬣

地僻

地僻天教養散材流年況著鬢毛催青山自繞孤城去
畫角常隨晚照來几淨雙鉤摹古帖甕香小啜試新醅
槩槎不是星躔遠無奈先生興盡回

冬夜聞角聲

娟娟清笳入雪雲白頭老守卧中軍自憐到老懷遺恨
不向居延塞外聞

憶在梁州夜雪深落梅聲裏玉關心山城老去功名忤
卧對寒燈淚滿襟

荊州歌

楚江鱗鱗綠如釀銜尾江邊繫朱舫東征打鼓挂高帆
西上湯豬聯百丈伏波古廟占好風武昌白帝在眼中
倚樓女兒笑迎客清歌未盡千觴空沙頭巷陌三千家

煙雨冥冥開橘花
峽人住多楚人少
土鑄爭響茱萸茶
芳草曲

蜀山遠處逢孤驛
缺斃顏垣芳草碧
家在江南妻子病
離鄉半歲無消息
長安城門西路去
細靄斜陽芳草暮
尊前一曲渭城歌
馬蹄萬里交河戍
人生誤計覓封侯
芳草愁人春復秋
只願東行至滄海
路窮草斷始無愁
夢回
病骨便衾暖羈懷
怯夢回鐘殘燈燼
落香冷雨聲來老

抱憂時志狂非濟世材明朝入冬假燒兔薦新醅

到巖十五晦朔郡釀不佳求於都下既不時至欲
借書讀之而寓公多祕不肯出無以度日殊惘

惘也

桐君放隱兩經秋小院孤燈夜夜愁名酒過於求趙璧
異書渾似借荊州溪山勝處真難到風月佳時事不休
安得連車載郢釀金鞭重作浣花遊

春殘

老墮空山裏春殘白日長庸醫司性命俗子議文章燭
映一池墨風飄半篆香箇中有佳處袖手看人忙

三月二十日晚酌

暫因賜沐作閒身太息纔餘一日春委地落花新著雨
穿簾歸燕不生人衙青此日怪長揖王翰當年謀卜鄰
商略晚窗須小醉朱櫻青杏正嘗新

北窗閒詠

陰陰綠樹雨餘香半捲疎簾置一牀得祿僅償賒酒券

思歸新草乞祠章古琴百衲彈清散名帖雙鉤榻硬黃
夜出灞亭雖跌宕也勝歸作老馮唐

夜出偏門還三山

月行南斗邊人歸西郊路水風吹葛木草露溼芒屨漁
歌起遠汀鬼火出破墓淒清醒醉魂荒怪入詩句到家
夜已半佇立叩蓬戶穉子猶讀書一笑慰遲算

四鼓酒醒起步庭下

酒解夜過半出門步中庭天高河漢白月淡煙霧青重

滴竹杪露疎見樹罅星壞楚啼寒蛩深竹明孤螢秋晚
雖未霜蠹葉時自零四序逝不留慨然感頽齡平生節
一把不博帶萬釘鴟溝謝拍拍鴻路追冥冥

雲門感舊

總角來遊老未忘背人歲月去堂堂稗松看到偃霜蓋
廢寺憶曾開寶坊佛几古燈寒焰短齋厨新粟午炊香
興闌未忍登車去更倚溪橋立夕陽

行在春晚有懷古隱

老辱明時乞一官逢春惆悵獨無歡舊人零落北音少
市肆蕭疎民力殫歸計已栽千箇竹殘年合挂兩梁冠
石帆山路頻回首箭茁蓴絲正滿盤

次韻和楊伯子主簿見贈

齋戒叩頭牋天公幸矣使我為枯蓬枯蓬於世百無用
始得曠快棄秋風此生安往失貧賤白髮蕭蕭對黃卷
今人雖鄰有不覲古人却向書中見猿啼月落青山空
舊隱夢寂思東蒙不願峨冠赤墀下且可短劒紅塵中

終年無人問良苦眼望青天惟自許可憐對酒不敢豪
它日空澆墳上土文章最忌百家衣火龍黼黻世不知
誰能養氣塞天地吐出自足成虹霓渡江諸賢骨已朽
老夫亦將正丘首杜郎苦瘦帽掀耳程子久貧衣露肘
君復作意尋齊盟豈知衰懦畏後生大篇一讀我起立
喜君得法從家庭鯤鵬自有天池著誰謂太狂須束縛
大機大用君已傳那遣老夫安注脚

杜興伯高程有徽
文若皆近以詩文

得名于諸公
而尤與予善

醉中作行草數紙

還家痛飲洗塵土醉帖淋漓寄豪舉石池墨瀋如海寬
玄雲下垂黑蛟舞太陰鬼神挾風雨夜半馬陵飛萬弩
堂堂筆陣從天下氣壓唐人折釵股丈夫本意陋千古
小醜何足膏碓斧捷書已服兒單于直用毛錐驚殺汝

記夢

夢裏都忘兩鬢殘恍然白紵入長安硯教紙熟脩溫卷
餓得驢騎候熟官紅葉滿街秋著句青樓燒燭夜追歡

如今萬事消除盡老眼摩挲靜處看

野興

紅飯青蔬美莫加鄰翁能共一甌茶
舍西日繁花房嫩
港北風生柳脚斜
筇杖不妨閒有伴
茆簷終勝老無家
自驚七十猶强健
采藥歸來見暮鴉

重午

葉底榴花蹙絳繒
街頭初賣菰池冰

會稽不藏冰賣者皆自行在來世

間各自有時節
蕭艾著冠稱道陵

梅雨

沐罷斜簪二十冠
斷雲殘靄暗江干
絲絲梅子熟時雨
漠漠楝花開後寒
剝采芸香辟書蠹
旋春麥麴續家餐
日長倦睫惟思閉
茗椀真須抵死寬

醉歌

讀書三萬卷仕宦皆束閣
學劍四十年妖血未染鏢
不
得為長虹萬丈掃寥廓
又不為疾風六月送飛電
戰馬
死槽櫪公卿守和約
窮邊指淮淝異域視京雒
嗚呼此

何心有酒吾忍酌平生為衣食斂版靴兩脚心雖了是
非口不給唯諾如今老且病鬢禿牙齒落仰天少吐氣
餓死實差樂壯心埋不朽千載猶可作

蝸廬

小葺蝸廬便著家
蘼薺莎徑任欹斜
為生草草僧行脚
到處悠悠客泛槎
孤蝶惜衣晴曝粉
穉蜂貪蜜晚爭花
有書嬾讀吾堪愧
睡起何妨自啜茶

故山

功名莫苦怨天慳一權歸來到死間傍水無家無好竹
卷簾是處是青山滿籃箭茁瑤簪白壓擔稜梅鶴頂殷
野興盡時尤可樂小江烟雨趁潮還

鏡湖

禹祠行樂盛年年繡鼓爭先卷畫船十里煙波明月夜
萬人歌吹早驚天花如上苑常成市酒似新豐不直錢
老子未須悲白髮黃公壚下且閒眠

禹廟

老尉鴻飛隱市門千年猶有舊巢痕陸生於此寓棋局

予二十年
前嘗寓居

曾丈時來開酒樽

曾丈謂
文清公

渺渺帆檣遙見海

冥冥蒲葦不知村數僧也復投詩社零落今無一二存

梅山

落磧泉奔舞玉虹護丹松老卧蒼龍霜柑籬角寒初熟
野碓雲邊夜自舂挈榼人沽村市酒打包僧趲寺樓鐘
幽尋自是年來懶枉道山靈不見容

雲門

冬晚山房書事

山澤何妨老太平巉巖骨相本來清月明滿地看梅影
露下隔溪聞鶴聲未辨藥苗逢客問欲酬琴價約僧評

闕

今俱絕且學湘纍拾菊英

屏迹山村病日增
烏皮几穩得閒凭
凍雲傍水封梅萼
嫩日烘窗釋硯冰
歲盡光陰饒衮衮
身閒醉夢且騰騰
蠻童采藥歸來晚
客至從嗔喚不應

春雨絕句

恰喜西窗晚照明
虛簷又報雨來聲
端憂不用占龜兆
壞盡花時自解晴

千點猩紅蜀海棠
誰憐雨裏作啼粧
殺風景處君知否

正伴鄰翁救麥忙

天公似欲敗蚕麤雨冒南山莫不收
駢女癡兒那念此
貪看科斗滿清溝

今年春半不知春飛電霹靂雷嚇殺人
縱得春衫元未著
免教惆悵洛陽塵

梅中最晚是細梅一日來看欲百回
俗紫凡紅終避舍
不妨自向雨中開

蕭條冬令侵春晚淅瀝寒聲滴夜長
更事老翁頑到底

每言宜睡好燒香

山園

買得新園近釣磯
旋營茆棟設柴扉
山經宿雨脩容出
花倚和風作態飛
世事只成驚老眼
酒徒頻約典春衣
狂吟爛醉君無笑
十丈愁城要解圍

東關

路入東關物象奇
角巾老子曳筇枝
蠶如黑蟻桑生後
秧似青鍼水滿時
穿市不嫌微雨溼
過溪翻喜壞橋危

當年野店題詩處又典春衣具午炊

雲蹙魚鱗襯夕陽放翁繫纜水雲鄉一筇疾步人驚健
斗酒高歌自笑狂風暝市樓吹絮雪蚕生村舍采桑黃
東阡南陌無窮樂底事隨人作許忙

宿野人家

避雨來投白版扉野人憐客不相違林喧鳥雀棲初定
村近牛羊算自歸土釜暖湯先濯足豆蔴吹火旋烘衣
老來世路渾諳盡露宿風餐未覺非

北窗

北窗本意傲羲皇老返園廬味更長
犢健戴星耕白水蚕飢衝雨采青桑
俚儒朱墨開冬學廟史牲牢祝歲穰
從此鬢毛雖似雪未妨擊壤頌虞唐

晚春感事

風惡房櫳燕子歸雨多山路蕨芽肥
青簷旋擣作寒食白葛預裁充暑衣
穉子日長供課早故人官達寄書稀
幽居自喜渾無事又向湖陰坐釣磯

徒倚闌干送落暉
年華冉冉恨依依
護雛燕子常更出
著雨楊花又嬾飛
已為讀書悲眼力
還因攬帶歎腰圍
親朋半作荒郊家
欲話初心淚滿衣

示兒

舍東已種百本桑
舍西仍築百步塘
早茶采盡晚茶出
小麥方秀大麥黃
老夫一飽手捫腹
不復舉手號蒼蒼
讀書習氣掃未盡
燈前簡牘紛朱黃
吾兒從旁論治亂
每使老子喜欲狂
不須飲酒徑自醉
取書相和聲琅琅

人生百病有已時，獨有書癖不可醫。
願兒力耕足衣食，讀書萬卷真何益。

村居初夏

算境難禁日月催，臘醅初見拆泥開。
壓車麥穗黃雲卷，食葉蠶聲白雨來。
薄飯蕨薇端可飽，短衫紵葛亦新裁。
宦途自古多憂畏，白首為農信樂哉。

煮酒開時日正長，山家隨分富年光。
梅青巧配吳鹽白，筍美偏宜蜀豉香。
風暖緊催蚕上簇，雨餘閒看稻移秧。

老夫見事真成晚浪走人間兩鬢霜

天遣為農老故鄉山園三畝鏡湖傍嫩莎經雨如秧綠
小蝶穿花似繭黃斗酒隻雞人笑樂十風五雨歲豐穰
相逢但喜桑麻長欲話窮通已兩忘

故鄉風物勝荆吳流水青山無處無列植園林多美菓
飽鉏畦壠富嘉蔬橋邊來淬剝桑斧池畔行芟縛糴蔬
我有素紈如月扇會憑名手作新圖

新秋感事

江上清秋昨夜回
漁扉正對荻洲開
志存天下食不足
節慕古人讒愈來
風際紙鳶那解久
祭餘芻狗會堪哀
蕭然散髮聽秋雨
剝領新涼入酒盃

秋思

一生書劍徧天涯
兩歲秋風喜在家
爛醉日傾無算酒
高眠時聽隔私蛙
園林夕照明丹柿
籬落初寒蔓碧花
便擬挂冠君會否
耳根不復耐喧譁

半年閉戶廢登臨
直自春殘病至今
帳外昏燈伴孤夢

簷前寒雨滴愁心中原形勝關河在列聖憂勤德澤深
遙想遺民垂泣處大梁城闕又秋砧

秋晚思梁益舊遊

幅巾筇杖立籬門秋意蕭然欲斷魂恰似嘉陵江上路
冷雲微雨溼黃昏

憶昔西行萬里餘長亭夜夜夢歸吳如今歷盡風波惡
飛棧連雲是坦途

滄波極目江鄉恨衰草連天塞路愁三十年間行萬里

不論南北怯登樓

蔬圃

蔬圃依山脚漁扉竝水涯
卧枝開野菊殘枿出秋茶
病骨知天色羈懷感物華
餘年有幾許且灌邵平瓜

農家

南畝勤耨穫西城謹蓋藏
種蕎糴霽日所获待微霜
豁碓新春白山厨野藪香
何須北窗卧始得做羲皇

城南上原陳翁以賣花為業得錢悉供酒資又不

能獨飲逢人輒強與其醉辛亥九月十二日偶
過其門訪之敗屋一間妻子飢寒而此翁已大
醉矣殆隱者也為賦一詩

君不見會稽城南賣花翁以花為糧如蜜蠶朝賣一株
紫算賣一枝紅屋破見青天盎中米常空賣花得錢送
酒家取酒盡時還賣花春春花開豈有極日日我醉終
無涯亦不知天子殿前宣白麻亦不知相公門前築堤
沙客來與語不能會但見醉髮覆面垂髭髻

晚飯罷小立門外有作

此心何敢慕輕肥尚媿無功飽薺薇
浦面烏銜殘靄去柳陰人荷一鋤歸
病嗟短髮紛紛白老覺初心種種非
百步空庭著明月黃昏手自掩荆扉

觀梅至花涇高
端叔解元見尋

春暎山中雲作堆
翁艇子出尋梅
不須問信道傍叟
但覓梅花多處來

山家算春

遶屋清陰合綠堤
綠草纖起蚕初放
食新麥已磨鎌
苦筍先調醬
青梅小蘸鹽
佳時幸無事
酒盡更須添
行飯獨相羊
扶藜過野塘
晴光生蝶粉
暝律變鶯吭
麤美羣兒競
蚕飢小婦忙
深知遊宦惡
窮死勿離鄉

入雲門小憩五雲橋

穀雨初過換夾衣
園林零落到薔薇
鳴鳩日暝遙相應
雖燕風柔折獨飛
臺省多才吾輩拙
江湖久客暮年歸
雲門蹋月方清絕
且倚溪橋看夕霏

春晚村居雜賦絕句

作堤蜿蜿六百尺西崦東村成一家
春雨乍晴桑吐葉秋風初冷稻吹花

鵝兒草綠侵行路
幘子花明照屋除
處處乞漿俱得酒
杖頭何恨一錢無

一篙湖水鴨頭綠
千樹桃花人面紅
茆舍青帘起余意
聊將醉舞會春風

朝書牛券牘
枯筆算祭蚕
神酌凍醪閒放無
憂窮有意

旁人錯羨此翁高

澆書滿把浮蛆瓮攤飯橫眠夢蝶牀莫笑山翁見機晚

也勝朝市一生忙

東坡先生謂晨飲為澆書
李黃門謂午睡為攤飯

午枕閉門無客攪夜燈開卷有兒同若為賤與天公道
盡乞餘生向此中

雨晴

閒曳枯筇自在行曲廊小閣賞新晴幽禽葉底吟風久
殘雨枝間照日明茶映盞毫新乳上琴橫薦石細泉鳴

亦知老健終難恃且復蕭然得此生

六月十四日微雨極涼

湖上清秋近
叅中白日長
雲來樹收影
雨過土生香
蓮小紅衣溼
瓜甘碧玉涼
晚來幽興極
移榻近方塘

水亭晚眺

暑雨初晴浦面寬
水亭景物卷簾看
聯舟作陣圍魚隊
屈竹成籬護芡盤
四海諸公半丘壑
百年幾夕倚闌干
日沈未用匆匆去
待挽銀河濯肺肝

逢萊館午憩

驛門繫馬聽蟬吟
翻動平生萬里心
橋畔笛聲催日落
城邊草色帶煙深
關河歷歷功名晚
歲月悠悠老病侵
憶戍梁州如昨日
憑闌西望一霑襟

夢遊散關渭水之間

平生望眼怯天涯
客裏何堪度歲華
但恨征輪無四角
不愁歸路有三叉
驛窗燈闇傳秋杵
關樹烟深宿暮鴉
叱犢老翁頭似雪
羨渠生死不離家

秋夜將曉出籬門迎涼有感

迢迢天漢西南落
喔喔鄰雞一再鳴
壯志病來消欲盡
出門搔首愴平生

三萬里河東入海
五千仞嶽上摩天
遺民淚盡秋風裏
南望京華又一年

秋日郊居

秋日畱連野老家
朱槃鮮鱸粲如花
已炊藟散真珠米

更點丁坑白雪茶

藟散米名
丁坑茶名

今年斟酌是豐年
社近兒童喜欲顛
半醉半醒村老子
家家門口掠神錢

兒童冬學鬧比鄰
據案愚儒却自珍
授罷村書閉門睡
終年不著面看人

農家十月乃遣子入學謂之冬學
所讀雜字百家姓之類謂之村書

新晴

積雨已淒冷
新晴還少和
稼收平野濶
木落遠山多
土潤朝畦菜
機鳴夜擲梭
時清年歲好
吾敢歎蹉跎

晚眺

秋晚閒愁抵酒濃
試尋高處倚枯筇
雲歸時帶雨數點
木落又添山一峰
鳴雁沙邊驚客艣
行僧煙際認樓鐘
箇中詩思來無盡
十手傳抄畏不供

九月一日夜讀詩藁有感走筆作歌

我昔學詩未有得
殘餘未免從人乞
力孱氣餒心自知
妄取虛名有慚色
四十從戎駐南鄭
酣宴軍中夜連日
打毬築場一千步
悶馬列廐三萬疋
華燈縱博聲滿樓
寶釵豔舞光照席
琵琶絃急冰電亂
羯鼓手勻風雨疾

詩家三昧忽見前屈實在眼元歷歷天機雲錦用在我
剪裁妙處非刀尺世間才傑固不乏秋毫未合天地賜
放翁老死何足論廣陵散絕還堪惜

小園

窄窄柴門短短籬山家隨分有園池客因問字來攜酒
僧趁分題就賦詩晨露每看花蕊拆夕陽頻見樹陰移
此二事非閒
寂不知也拂衣司諫猶忙在此趨淵明却少知

九月二十三夜小兒方讀書而油盡口占此詩示

之

徹骨貧來累始輕孤村月上正三更汝緣油盡眠差早
我亦尊空醉不成南陌金羈良自苦北邙麟冢半無名
書生事業期千載得喪從來未易評

今年立冬後菊方盛開小飲

胡床移就菊花畦飲具酸寒手自攜野實似丹仍似漆
村醪如蜜復如醞傳方那解烹羊脚破戒猶慚擘蟹臍
一醉又驅黃犢出冬晴正要飽耕犁

步至近村

藥物扶持病漸平，布裘絮帽出柴荆。
荒堤經雨多牛跡，村舍無人有碓聲。
數蝶弄香寒菊晚，萬鴉回陣夕楓明。
老翁隨意閒成句，不似劉侯要取名。

夜讀范至能攬轡錄言中原父老見使者多揮涕
感其事作絕句

公卿有黨排宗澤，帷幄無人用岳飛。
遺老不應知此恨，亦逢漢節解沾衣。

書適

老翁垂七十其實似童兒
山果啼呼覓鄉儼喜笑隨羣
嬉累瓦塢獨立照盆池
更挾殘書讀渾如上學時

十一月四日風雨大作

僵臥孤村不自哀尚思為國戍輪臺
夜闌卧聽風吹雨
鐵馬冰河入夢來

病起

少年射虎南山下惡馬強弓看似無
老病即今那可說

出門十步要人扶

書巢冬夜待旦

埽葉擁堦寒犬行
編茆護柵老雞鳴
風霜漸逼歲時晚
形影相依燈火明
史策千年媿豪傑
關河萬里愴功名
固應死抱無窮恨
老病何由更請纓

冬晴閒步東村由故塘還舍作

紅藤拄杖獨相羊
路遠東村小嶺傍
水落枯萍黏蟹棹

鄉人植竹以取蟹謂之蟹棹

雲開寒日上漁梁
洛陽二頃言良是
光

範三書計本狂歷盡危機識天意要令閒健反耕桑

寄宇文成州

成州太守比何如夢裏依然把臂初
復起卿當用卿法長閒吾實愛吾廬
五湖風雨孤舟夜萬里關山一紙書
正使兩翁長隔濶子孫它日莫相疎

春雨

午夜聽春雨發生端及期世憂殊未艾
天意固難知士節承平日人材南渡時
後生聞見狹撫枕歎吾衰

僧廬

僧廬土木塗金碧四出徵求如羽檄富商豪吏多厚積
宜其棄金如瓦礫貧民妻子半菽食一饑轉作溝中瘠
賦斂鞭笞縣庭亦持以與僧亦不惜古者養民如養兒
勸相農事憂其饑露臺百金止不為尚媿七月周公詩
流俗紛紛豈知此熟視創殘謂當爾傑屋大像無時止
安得疲民免饑死

贈劉改之秀才

君居古荊州醉膽天宇小尚不拜龐公况肯依劉表胸
中九淵蛟龍蟠筆底六月冰電寒有時大叫脫烏幘不
怕酒盃如海寬放翁七十病欲死相逢尚能刮眼看李
廣不生楚漢間封侯萬戶宜其難

春社

太平處處是優場社日兒童喜欲狂且看參軍喚蒼鶻
京都新禁舞三郎

宋詩鈔卷六十五

欽定四庫全書薈要卷二萬三百十九

集部

宋詩鈔卷六十六

內閣中書舍人吳之振編

陸游劍南詩鈔三

村夜

寂寂山村夜悠然醉倚門
月昏天有暈風軟水無痕
迹為遭讒遠身由不仕尊
敢嗟車馬絕同社自雞豚

困甚戲書

官如枝頭乾不受雨露恩身如水上浮泛泛寧有根刈
茆以苫屋縛柴以為門故人分祿米隣父餉魚殖前門
吏徵租後門質襦裙不敢謀歲月且復支朝昏雨餘幽
花拆亦可侑清尊吾生信已乎終老此山村

戲詠山陰風物

萬里秦吳稅駕遲還鄉已嘆髣成絲城邊綠樹山陰道

水際朱扉夏禹祠項里楊梅鹽可徹

太白梁國吟云玉盤楊梅為君設吳

鹽如花皎白雪不知楊梅酸者乃薦以鹽佳品未嘗用也

湘湖蓴菜鼓偏宜

蓴菜最宜鹽鼓

所謂未下鹽鼓者言下鹽鼓則非
羊酪可敵益盛言萐羹之美爾

圖經草草尚堪恨好

事他年采此詩

癸丑七月二十七日夜夢遊華嶽廟

驛樹秋風急關城暮角悲平生忠憤意來拜華山祠
牲碑新正朔祠祝古衣冠神亦豈堪此出門山雨寒

僕頃在征西大幕登高望關輔樂之每冀王師拓

定得卜居焉暇日記此意以示子孫

八月殘暑退秋聲滿庭樹豈無四方志衰病迫霜露擾

攘爭戰時人怨天震怒南北會當一老吾悲不過子孫
勉西遷俗厚吾所慕約已收孤嫠教子立門戶黍稌暗
阡陌鶉雉足匕箸永為河渭民勿憚關山路

秋夜感舊十二韻

冷螢綴蓬根忽復照高樹年光逝不留百感集遲暮往

者秦蜀間慷慨事征戍猿啼鬼迷店馬噤飛石鋪鬼迷店在

大散關下飛石鋪在小益道中常有崩石

危嶺高入雲朽棧劣容步天近星

宿大江惡蛟鼉怒意氣頗自奇性命那復顧最懷清渭

上衝雪夜掠度封侯細事爾所冀垂竹素兜鍪竟何成
豈獨儒冠誤當時妄授尉旗纛今照路浩歌遂成章聊
慰老不遇

秋晚閒步隣曲以予近嘗卧病皆欣然迎勞

放翁病起出門行績女窺籬牧豎迎酒似粥釀知社到
餅如盤大喜秋成歸來早覺人情好對此彌將世事輕
紅樹青山只如昨長安拜免幾公卿

雨夜

歲晚茆茨劣自容
齒搖將脫髮將童
心遊萬里關河外
身臥一窓風雨中
醫不可招惟忍病
書猶能讀足忘窮
夜闌睡覺蛩聲裏
時見燈花落碎紅

夢至洛中觀牡丹繁麗溢目覺而有賦

兩京初駕小羊車
顚顚江湖歲月賒
老去已忘天下事
夢中猶看洛陽花
妖魂豔骨千年在
朱彈金鞭一笑譁
寄語邊人莫癡絕
祈連還汝舊風沙

秋夜獨酌

壯志隨年減，羈愁與夜長。
月高寒暈淡，花坼露華香。
仕畏讒，銷骨歸。判酒腐腸，
青燈寫孤影，相勸盡餘觴。

自嘲

歲月推遷萬事非，放翁可是白頭癡。
此生竟出古人下，有志尚如年少時。
僻學固應知者少，長歌莫問和予誰。
自嘲自解君毋怪，老大從人百不宜。

數日秋氣已深清，坐無酒戲題長句

漸近重陽天氣嘉，數椽茆竹淡生涯。
山童擁篲埽黃葉，

鄰女傍籬收碧花避俗要生輪四角出門何啻路三叉
晚窓酒盡無多歎試問前村好事家

東村散步有懷張漢州

扶杖村東路秋來始此回寒鴉盤陣起野菊臥枝開憂
國丹心折懷人雪鬢催房湖八千里那得尺書來

排悶

四十從軍渭水邊功名無命氣猶全白頭爛醉東吳市
自拔長劍割彘肩

西塞山前吹笛聲曲終已過雒陽城君能洗盡世間念
何處樓臺無月明

放歌行

君不見汾陽富貴近古無二十四考書中書又不見慈
明起自布衣中九十五日至三公人生窮達各有命拂
衣徑去猶差勝介推焚死終不悔梁鴻寄食吾何病安
用隨牒東復西獻諛耐辱希階梯初無公論判涇渭徒
使新貴矜雲泥稽山一老貧無食衣破履穿面黧黑誰

知快意舉世無南山之南北山北

山頭石

秋風萬木賁春雨百草生造物初何心時至自枯榮惟
有山頭石歲月浩莫測不知四時運常帶太古色老翁
一生居此山脚力欲盡猶躋攀時時撫石三歎息安得
此身如爾頑

野興

老去癡頑百不能非醒非醉日騰騰敲門惟有徵租吏

好事元無送米僧舊俗不還誰復念古書雖在漸難憑
平生意氣今如此惆悵西窓半夜燈

古築城曲

築城聲酸嘶漢月傍城低白骨若不掩高與長城齊
嶧山訪秦碑斷裂無完筆惟有築城詞哀怨如當日

山園

山泉引派漲清池野蔓移根種短籬藝果極知非老事
接花聊復效兒嬉提壺言語閒顏聽斷木衣襦緩步窺

莫笑題詩還滿紙小園幽事要君知

古別離

孤城窮巷秋寂寂美人停梭夜歎息空園露溼荆棘枝
荒蹊月照狐狸迹憶君去時兒在腹走如黃犢爺未識
紫姑吉語元無據况憑瓦兆占歸日嫁來不省出門前
魂夢何因識酒泉粉綿磨鏡不忍照女子盛時無十年
病起山居日有幽事戲作

鶴骨龜腸欲不禁扶衰初喜罷呻吟盆山永釋書窓暝

藥竈香濃道院深
筆健乍臨新獲帖
手生重理舊傳琴
閉門局促還堪恨
雲海何時豁此心

水村曲

山村今年晚禾旱
奏下民租蠲大半
水村雨足米狼戾
也放三分慰民意
看榜歸來迭歌舞
共喜清平好官府
老翁猶記軍興時
汝輩少年那得知

賽神曲

擊鼓坎坎吹笙鳴
綠袍槐簡立老巫
紅衫繡裙舞小

姑烏白燭明蠟不如鯉魚糝美出神厨老巫前致詞小
姑抱酒壺願神來享常懽娛使我嘉穀收連車牛羊暮
歸塞門間雞鷺一母生百雛歲歲賜粟年年蠲租蒲鞭
不施園土空虛東草作官但形模刻木為吏無文書淳
風復還羲皇初繩亦不結況其餘神歸人散醉相扶夜
深歌舞官道隅

涼州行

涼州四面皆沙磧風吹沙平馬無迹東門供張接中使

萬里朱宣布襖勅勅中墨色如未乾君王心念兒郎寒
當街謝恩拜舞罷萬歲聲上黃雲端安西北庭皆郡縣
四夷朝貢無征戰舊時強寇陷關中五丈原頭作邊面

七十

七十殘年百念枯桑榆元不補東隅但存隱具金鴉觜
邯鄲朝衣玉鹿盧身世蜚眠將作繭形容牛老已垂胡
客來莫問先生處不釣娥江即鏡湖

正月二十日晨起弄筆

深院窻扉曉色遲
新愁宿醉兩參差
雨聲欲與夢相入
春意不隨人共衰
零落殘梅臨小約
縱橫野水赴清池
物華撩我緣何事
似恐新年漸廢詩

新闢小園

西戍歸來鬢已霜
生兒又過乃翁長
眼明身健殘年足
飯軟茶甘萬事忘
學廢僅能書姓字
客來嬾復倒衣裳
山園寂寂春將晚
酷愛幽花似蜜香

新展山園半畝強
笑人車馬出籠坊
山禽乍暖慙慙語

野蘓無風自在香
點點水紋迎細雨
疎疎籬影界斜陽
出門遙向隣翁說
釋耒相從共一觴

久不得張漢州書

儘道三巴遠
邨無一紙書
衰遲自難記
不是故人疎

春晚村居

一事元無可得忙
悠然半醉倚胡牀
牡丹枝上青春老
燕子聲中白日長
身世已如風六鷁
文章仍似閨黃楊
太平有象無人識
南陌東阡擣麝香

遊雲山諸蘭若

花過木陰合溪雲生暮涼牛行響白水鷺下點青秧古

寺宛如昔釋松森已行

道傍松及三十年則僧輒伐去復種小者予自幼歲至今已見

三種耆年不下榻童子爲燒香

園中小飲

此老胸中萬頃寬小園幽徑日追歡寧教酒欠尋常債
耻就人求本分官高柳陰濃煙欲暝叢花紅濕露初溥
時月桂要知澤國年光晚已過清明尚淺寒
方盛開

鳥啼

野人無歷日鳥啼知四時二月聞子規春畊不可遲三月聞黃鸝幼婦閔蠶饑四月鳴布穀家家蠶上簇五月鳴鴉舅苗稚憂草茂人言農家苦望晴復望雨樂處誰得知生不識官府葛衫麥飯有即休湖橋小市酒如油夜夜扶歸常爛醉不怕行逢灞陵尉

題陽關圖

誰畫陽關贈別詩斷腸如在渭橋時荒城孤驛夢千里

遠水斜陽天四垂青史功名常蹭蹬白頭襟抱足乖離
山河未洗風塵暗一寸孤愁只自知

夜分不寐起坐園中至旦

涼氣蘇衰疾幽情入杖藜月驚孤鵲起天帶衆星西松
菊今彭澤山川古會稽清吟殊未愜喔喔已晨雞

醉睡初覺偶作

小圃醒還醉幽窓起復眠虛明炷香地清潤斲花天老
去才雖盡窮來志益堅阿瞞那可語平日笑橋玄

閒中

閒中高趣傲羲皇身卧維摩示病牀活眼硯凹宜墨色
長毫甌小聚茶香門無客至惟風月案有書存但老莊
問我東歸今幾日坐看庭樹六番黃

悶極有作

貴已不如賤狂應又勝癡新寒壓酒夜微雨種花時堂
下藤成架門邊枳作籬老人無日課有興即題詩

三峽歌

乾道庚寅予始入蜀上下三峽屢矣後二十五年歸
畊山陰偶讀梁簡文巴東三峽歌感之擬作九首實
紹熙甲寅十月二日也

神女廟前秋月明黃牛峽裏暮猿聲危途性命不容恤
百丈牽船侵夜行

不怕灘如竹節稠新灘已過可無憂古粧戕戕一尺髻
木盞銀盃邀客舟

十二巫山見九峰船頭彩翠滿秋空朝雲暮雨渾虛語

一夜猿啼明月中

錦繡樓前看賣花
麝香山下摘新茶
長安卿相多憂畏
老向夔州不用嗟

險詐沾沾不媿天
交情回首薄如烟
東遊萬里雖堪樂
灩澦瞿塘要放船

蠻江水碧瘴花紅
白舫黃旗無便風
落萬四時常避水
棚居高出亂雲中

亂插山花簪子紅
蠻歌相和讓西東
忽然四散不知處

踏月捫蘿歸洞中

萬州溪西花柳多
四鄰相應竹枝歌
問君今夕不痛飲
奈此滿川明月何

我游南賓春暮時
蜀船曾繫挂猿枝
雲迷江岸屈原塢
花落空山夏禹祠

書室明煖終日婆娑
其間倦則扶杖至小園戲作
長句

美睡宜人勝按摩
江南十月氣猶和
重簾不捲留香久

古硯微凹聚墨多月上忽看梅影出風高時送鴈聲過
一杯太淡君休笑牛背吾方扣角歌

初冬

老客人間百事情慵樂哉閉戶過今冬朝爐獸炭騰紅焰
夜榻蠻氊擁紫茸蝟刺圻蓬新栗熟鵝雛弄色凍醅濃
題詩正自消閒日本不爭先萬戶封

幽居

雨霽雞棲早風高雁陣斜園丁刈霜稻村女賣秋茶缺

井磨樵斧枯桑繫釣槎客來那用問此是放翁家

冬夜獨酌

寒水茫茫浸月明疎鐘杳杳帶霜清一樽濁酒有妙理
十里荒雞非惡聲物外雖增新跌宕胸中未洗舊崢嶸
頽然坐睡蒲團穩殘火昏燈伴五更

雜詠園中菓子

不酸金橘種初成無核枇杷接亦生珍產已從幽圃得
濁醪仍就小槽傾

漿石榴隨饒作節蠟櫻桃與酪同時兩株偶向池邊種
可喜今年墜折枝

架垂馬乳收論斛港種雞頭采滿船鼃鼎若為占食指
麴車未用墮饒涎

山杏谿桃本看花累累成實亦堪誇鹽收蜜漬饒風味
送與山僧下夜茶

歲暮感懷

家世本無年甲子近一周小子獨何幸七十今平頭往

者收朝迹亟欲求歸休厚恩許奉祠得祿歲愈憂三釜
不及親顧為妻子留何由洗此媿欲挽天河流

高皇昔中興風雨躬沐櫛一士未嘗遺萬里皆馳日兼
聽闢言路虛懷詢得失孤臣實草芥亦獲對宣室龍顏
宛在目德不報萬一橋山松栢寒淚盡史臣筆

王師宿梁益行臺護諸將腐儒忝辟書萬里至渭上旌
旗照關路風雪暗戎帳堂堂鐵馬陣疊疊木牛餉誰知
骨相薄空負心膽壯回首二十年撫事增悲愴

在昔祖宗時風俗極粹美人材兼南北議論忘彼此誰
令各植黨更仆而迭起中更征戰旤此風猶未已臣不
難負君生者固賣死儻築太平基請自厚俗始

井地以養民整整若棊畫初無甚貧富家有五畝宅哀
哉古益遠禍始開阡陌富豪役千奴貧老無寸帛困窮
禮義廢盜賊起促迫誰能講古制壽我太平脉

贈應秀才

過宋不見元城公渡淮不見陳了翁當時人人皆太息

至今海內傾高風老夫七十居鄉縣齷齪龍鍾何足見
辱君雪裏來叩門自說辛勤求識面我得茶山一轉語
文章切忌參死句知君此外無他求有求寧踏三山路

山園雜詠

祠祿留人未挂冠山園三畝著身寬百年竟向愁邊老
萬事元輸靜處看花徑糝紅供晚醉月天生暈作春寒
汗青事業都忘盡時賴吾兒舉話端

殘春終日在林亭散髮披衣醉復醒科斗已成鼃閣閣

櫻桃初結子青青魚遊滄海寧濡沫禽慕雕籠即翦翎
薄晚東風吹小雨笑攜長鏡伴畦丁

春晚懷山南

梨花堆雪柳吹絲常記梁州古驛前二十四年成昨夢
每逢春晚即悽然

壯歲從戎不憶家梁州裘馬鬪豪華至今夜夜尋春夢
猶在吳園藉落花

身寄江湖兩鬢霜金鞭朱彈夢猶狂遙知南鄭城西路

月與梨花共斷腸

春晚雜興

澤國固多雨暮春猶薄寒
兒童葺茶舍婦女賽蠶官
閱世年雖往為農興未闌
窮途得一飽亦足慰艱難

池面萍初紫牆頭杏已青
攜兒撐小艇留客坐孤亭
相法無侯骨生年直酒星正
須遺萬事莫遣片時醒

小市湖橋北幽居石埭西
蒲深姑惡哭樹密姊歸啼
山茗封青箬村酤坼赤泥
平生汗簡手投老慣扶犁

病瘍無意緒閉戶作生涯草草半盂飯悠悠一盃茶笑
穿居士僑閒看女郎花

唐人謂辛夷為女郎花園中有此花一叢二百朵

莫問

明朝事忘家即出家

齋中雜題

列屋娥眉不足誇可齋別自是生涯閒將西蜀團窠錦
自背南唐落墨花

隼几硯涵鸛鵒眼古奩香斲鷓鴣斑絕知造物慙懃意
成就衰翁到死閒

上巳書事

單衣初著下湖天，飛蓋相隨出郭船。
得雨人人喜秧信，祈蠶戶戶斂神錢。
黃雞煮臠無停筯，青韭淹菹欲墮涎。
丞相傳聞又三押，衡茅未改日高眠。

春夏之交風日晴美欣然有賦

芳潤園林不似貧，年光無盡逐番新。
來禽顏色不禁雨，搏黍語言如惜春。
身外豈關吾輩事，鏡中已換昔時人。
神仙定未超塵俗，猶插金貂侍帝晨。

初夏行平水道中

老去人間樂事稀
一年容易又春歸
市橋壓擔萼絲滑
村店堆盤豆莢肥
傍水風林鶯語語
滿園煙草蝶飛飛
郊行已覺侵微暑
小立桐陰換夾衣

幽棲

閒人了無事地
僻稱幽棲時
米留雞食移琴避
燕泥桐生窓欲暗
筍長徑還迷
不作客車計
門間儘放低

誰謂幽棲陋
茅茨足庇牀
雨便梧葉大
風度練花香
浴

佛兜童喜縑絲婦女忙
竭來三十載吾髻固宜霜

乾道丙戌

始卜居鏡湖之三
山今甫三十年矣

十月十七日予生日也
孤村風雨蕭然偶得二絕
句予生淮上是日平旦
大風雨駭人及予墮地
雨乃止

少傳奉詔朝京師
檣船生我淮之湄
宣和七年冬十月
猶是中原無事時

我生急雨暗淮天
出沒蛟鼉浪入船
白首功名無尺寸

茅簷還聽雨聲眠

枕上偶成

放臣不復望脩門
身寄江頭黃葉村
酒渴喜聞疎雨滴
夢回愁對一燈昏
河潼形勝寧終棄
周漢規模要細論
自恨不如雲際雁
南來猶得過中原

舍北閒望作六字絕句

潘岳一篇秋興
李成八幅寒林
舍北偶然倚杖
盡見古人用心

題菴壁

身似蝸牛麤有廬却緣無用得安居地
爐封火欺寒雨紙閣油窓見細書
麤熟山僧分餽飫船來溪友餉薪樗
閉門莫笑衰顏甚讀易論詩亦未疎

貧甚作短歌排悶

閒何濶逢諸葛畏人常憂不得活事不諧問文開不踴
權門更可哀即今白髮如霜草一飽茫然身已老惟有
躬耕差可為賣劍買牛悔不早年豐米賤身獨饑今朝

得米無薪炊地上去天八萬里空自呼天天豈知

雨夜有懷張季長少卿

放翁雖老未忘情獨卧山村每自驚鼎鼎百年如電速
寥寥一笑抵河清梅初破藟行江路燈欲成花聽雨聲
正用此時思劇飲故交零落愴餘生

春思

七十老翁身退耕可憐未減舊風情典衣取酒那論價
秉燭看花每到明江浦時時逢畫幟寺樓處處聽新鶯

此生無復陽關夢不怕樽前唱渭城

丙辰上元前一日

弊裘破帽髮鬢髻宛似山房罷講僧身病不禁連夜雨
家貧只挂去年燈脩椽柳外掀樓角危檻雲間露塢層
自笑閒遊本無定興闌隨處倚枯藤

懷舊

狼煙不舉羽書稀幙府相從日打圍最憶定軍山下路
亂飄紅葉滿戎衣

翠崖紅棧鬱參差小益初程景最奇誰向豪端收拾得
李將軍畫少陵詩

幽居初夏

湖山勝處放翁家槐柳陰中野徑斜水滿有時觀下鷺
草深無處不鳴蛙籜龍已過頭番筍木筆猶開第一花
歎息老來交舊盡睡餘誰共午甌茶

六月二十四日夜分夢范至能李知幾尤延之同
集江亭諸公請予賦詩記江湖之樂詩成而覺

忘數字而已

露箬霜筠織短篷飄然來往淡煙中偶經菱市尋谿友
却揀蘋汀下釣筒白菡萏香初過雨紅蜻蜓弱不禁風
吳中近事君知否團扇家家畫放翁

閒居自述

自許山翁嬾是真紛紛外物豈關身花如解笑還多事
石不能言最可人淨掃明窓憑素几閒穿密竹岸烏巾
殘年自有青天管便是無錐也未貧

秋雨初霽試筆

墨入紅絲點漆濃
閒將倦筆寫秋容
雨聲已斷時聞滴
雲氣將歸別起峰
斜日半穿臨水竹
好風遙送隔城鐘
遠遊更動輕舟興
太息何人解見從

舍北搖落景物殊佳偶作

路擁新霜葉溪餘舊漲沙
栖烏初滿樹歸鴨各知家
世事元堪笑吾生固有涯
南村聞酒熟試遣小童賒
屋角成金字溪流作縠紋
斜通小橋路半掩夕陽門
孤

艇衝煙過疎鐘隔塢間杜門非獨病實自厭紛紛
草徑人稀到柴扉手自開林疎鴉小泊溪淺鷺頻來簷
角除瓜蔓牆隅斲芋魁東鄰膳肉至一笑舉新醅

醉中信筆作四絕句既成懼觀者不知野人本心
也復作一絕

麥野桑村有酒徒過門相覓醉相扶朱門日日教歌舞
也有儂家此樂無

過得一日過一日人間萬事不須謀鄰家幸可賒芳醞

紅藥何曾笑白頭

今朝賣穀得青錢
自出街頭買兔肩
草火燎來香滿屋
未容下筯已流涎

老病人間足畏途
怕人渾似怕於菟
晴明頗動青鞵興
先探門前有客無

治道巍巍本易成
狂言安得略施行
太平事業人皆見
不計封倫死與生

睡起至園中

春風忽已遍天涯老子猶能領物華
淺碧細傾家釀酒小紅初試手栽花
野人易與輸肝肺俗語誰能挂齒牙
更欲世間同省事勾回蟻戰放蜂衙

雨中作

三日雨頻作昏昏饒睡眠泥深散酒市
風惡惱燈天茆屋松明照茶鐺雪水煎
山家自成趣撫枕寄悠然短髮白如絲
梅花似舊時掩屏愁入夢隱几雨催詩
病為陰天劇春綠閨歲遲非關畏車馬
衰甚實難支

立春日

花壓烏巾酒滿卮，舊逢春日恨春遲。
如今病卧孤村裏，過了新春也不知。

春行

九日春陰一日晴，強扶衰病此間行。
猩紅帶露海棠濕，

鴨綠平堤湖水明。

杜子美曉看紅濕處，花重錦官城。李太白蜀江紅且明，用濕字明字可謂

奪造化之功，世未有拈出者。

酒賤柳陰逢醉卧，土肥稻壟看深耕。
山

翁莫道渾無用，解與明時說太平。

賞花至湖上

吾國名花天下稀
園林盡日敞朱扉
蝶穿密葉常相失
蜂戀繁香不記歸
欲過用愁風蕩漾
半開却要雨霏微
良辰樂事真當勉
莫遣忽忽一片飛

暮春

數間茆屋鏡湖濱
萬卷藏書不救貧
燕去燕來還過日
花開花落即經春
開編喜見生平友
照水驚非曩歲人
自笑少年心尚在
憑高慷慨欲忘身

七十三吟

七十三年事事新
涵濡幸作六朝民
髮無可白方為老
酒不能賒始覺貧
末路已悲身是客
此心猶與物為春
柴門勿謂常岑寂
時有鄉鄰請藥人

舍北行飯書觸目

晚飧初潑一甌茶
曳杖閒行興未涯
煙樹參差墨濃淡
風鴉零亂字橫斜
夕陽偏傍平橋路
寒蝶猶依晚菊花
堪笑衰翁耐荒寂
短衣霑露未還家

春近山中即事

節物貧家有故常春盤蠟粥逐時忙悠悠歲月催雙鬢
草草雞豚薦一觴人意自殊平日樂梅花寧減故時香
小園新展西南角挂樹青蘿百尺長

雪夜感舊

江月亭前樺燭香龍門閣上馱聲長亂山古驛經三折
小市孤城宿兩當晚歲猶思事鞍馬當時那信老耕桑
綠沉金鎖俱塵委雪洒寒燈淚數行

將進酒

我欲挽住北斗杓常指蒼龍無動搖春風日夜吹草木
只有榮盛無時凋我欲剗斷日行道陽烏當空月杲杲
非惟四海常不夜亦使人生失衰老如山積麴高崔嵬
大江釀作蒲萄醅頽然一醉三千盃借問白髮何從來

雜感

志士山棲恨不深人知已是負初心不須先說嚴光輩
直自巢由錯到今

百年鼎鼎成何事寒暑相催即白頭縱得金丹真不死
摩挲銅狄更添愁

山人那信宦途艱強著朝衣趁曉班豪氣不除狂態作
始知只合死空山

故舊書來訪死生時聞剝啄叩柴荆自嗟不及東家老
至死無人識姓名

幽居

小舫藤為纜幽居竹織門短籬圍藕蕩細路入桑村魚

膾槎頭美醕傾粥面渾殘年謝軒冕猶足號黎元

夏日

過眼春光久已空
曬絲擣麥又匆匆
新泥滿路梅黃雨
古木號山月暈風
角黍交新間蹲俎
靈符墨濕照房櫳
歲華不為衰翁駐
且付餘生一笑中

雨斷雲歸旋作晴
尚餘紅濕在簾旌
燕雛掠地飛無力
梅子臨池墜有聲
米糲解包供午餉
萍壑傍枕析朝醒
此翁不負頑軀處
捫腹時時遶舍行

感舊

要識梁州遠南山在眼邊霜郊熊撲樹雪路馬蒙羶慘

淡遺壇側

拜韓信壇至今猶存

蕭條古廟墻

沔陽有蜀後主所立武侯廟

百詩

猶可想歎息遂無傳

予山南雜詩百餘篇舟行過望雲灘墜水中至今以為恨

夜涉南沮水朝過小益城梯山天一握度棧土微平雨

近秦雲暗霜高隴月明至今孤夢裏喝馬有遺聲

喝馬皆七

字韻語聞之
悲愴動人

早發金堆市更衣石櫃亭灘聲秋後壯山色雨餘青道

渾愁車轍橋危避駝鈴功名竟何在撫事感頽齡

塵土暗貂裘森然白髮稠年光真袞袞吾事竟悠悠馬

宿平沙夜

軍中馬及廐卒夏夜皆露宿沙上

烽傳絕塞秋

平安火竝南山來至山南

城下故人零落盡追寫只添愁

秋夕露坐作

銀河半落露華清南斗闌干北斗明冉冉方悲老將至
纖纖又歎月初生酒牀細滴香浮瓮衣杵相聞聲滿城
萬卷讀書無用處却將耕稼報昇平

秋思

身似龐翁不出家，一窓自了淡生涯。
山薑零落初成子，石竹淒涼半吐花。
寒澗挹泉供試墨，墮巢篝火喚煎茶。
掩關本意君知否，兩耳衰年不耐譁。

豐歲

豐歲驪聲動四鄰，深秋景氣粲如春。
羊腔酒擔爭迎婦，鼉鼓龍船共賽神。
處處喜晴逢甲子，家家築屋趁庚申。
老翁欲伴鄉間醉，先辦長衫紫領巾。

秋賽

柳姑廟前煙出浦冉冉縈空青一縷須臾散作四山雲
明日來為社公雨小巫屢舞大巫歌士女拜祝肩相摩
芳茶綠酒進雜選長魚大載高嵯峨常年徵科煩箠楚
縣家血濕庭前土妻啼兒號不敢怨期會常憂累官府
今年家家有餘粟縣符未下輸先足木刻吏蒲作鞭自
然粟帛如流泉儲積不愁無九年

小舟過吉澤效王右丞

澤園霜露晚孤村煙火微本去官道遠自然人跡稀木
落山盡出鐘鳴僧獨歸漁家閒似我未夕閉柴扉

太息

自古才高每恨浮偉人要是出中州即今未必無房魏
埋沒塵沙死即休

闕輔堂堂轉塞塵渭城杜曲又逢春安知今日新豐市
不有悠然獨酌人

歲首書事

東風入律寒猶劇多稼占祥雪欲成

雲陰作雪彌旬至開歲雪意愈濃明

日戌初立春猶可為臘雪也

鬱壘自書誇腕力屠蘇不至歎人情

今歲

無餽屠蘇者

呼盧院落諱新歲

鄉俗歲夕聚博謂之試年庚

賣困兜童起

五更

立春未明相呼賣春困亦舊俗也

白髮滿頭能且健剗隨鄰曲樂

昇平

菴中獨居感懷

無錢溪女亦留魚有雨東家每借驢
藜粥數匙晨壓藥
松肪一碗夜觀書
黃紬被暖閒無厭
白布衫長樂有餘

南陌東阡春事動放翁作計未全疎

春日園中作

杏花開過尚輕寒盡日無人獨倚闌
久別名山憑夢到每思舊友取書看
塵埃幸已賒腰折富貴深知欠面團
老去逢春都有幾一杯行復送春殘

春日小園雜賦

市塵不到放翁家繞麥穿桑野徑斜
夜雨長深三尺水曉寒留得一分花
悶從鄰舍分春瓮閒就僧窓試露芽

自今年光應更好日驅秧馬聽縑車

春思

兀兀治聾酒未醒霏霏潑火雨初晴愁看入戶桃花片
閒聽爭巢燕子聲百疾侵陵成老大一春轉盼又清明
蘭亭禹廟渾如昨回首兜時似隔生

白樂天詩云倦倚繡牀愁不動緩垂綠帶髻鬟低
遼陽春盡無消息夜合花前日又西好事者畫
之為倦繡圖此花以五六月開山中多于茨棘

人殊不覺之為賦小詩以寄感歎

王室東遷歲月賒兩京漠漠暗塵沙
繡牀倦倚人何在
風雨漫山夜合花

蜉蝣行

蜉蝣至細能知時春風澄雨占無遺
蜻蜓滿空乃不知
庭除一出無歸期樂哉蜻蜓高下飛
蜉蝣未盡何憂饑
簷間蜘蛛亦伺汝吐絲織網腹如鼓

村舍雜書

中春農在野蠶事亦隨作手種臨安青

桑名

可飼蠶百箔

累累繭滿簇繹繹絲上簍老子雖安眠衣帛可無作

舍南種胡麻三日幸不雨晨起親按行已見青覆土窮人如意少喜色滿眉宇兒童勿惰偷造物不負汝

五月新麪成六月甘瓜熟作麪及良時火見金始伏懸知桑落後醅面濃如粥再拜謝天公無功叨美祿

予家釀用

宛丘瓜麪法

折蓮釀作醯采豆治作醬開歷揆日時汲井滌瓮盎上

奉時祭須下給春耕餉咨爾後之人歲事不可曠

東山石上茶鷹爪初脫韝雪落紅絲磴香動銀毫甌爽
如聞至言餘味終日留不知葉家白亦復有此不
逢人乞藥栽鬱鬱遂滿園玉芝來天姥黃精出雲門丹
茁雨後吐綠葉風中翻活人吾豈能要有此意存

軍興尚戎衣冠帶謝褒博禿巾與小裋顧影每懷忤及
今反士服始覺榮大爵出入阡陌間終身有餘樂

讀書乃一癖我亦不自知坐書窮至老更欲傳吾兒吾

免復當傳百世以為期君看北山公太行尚可移
爵祿九鼎重名義一羽輕人見共如此吾道何由行湖
山有一士無人知姓名時時風月夕遙聞清嘯聲

陳阜卿先生為兩浙轉運司考試官時秦丞相孫
以右文殿脩撰來就試直欲首送阜卿得予文
卷擢置第一秦氏大怒予明年既顯黜先生亦
幾陷危機偶秦公薨遂已予晚歲料理故書得
先生手帖追感平昔作長句以識其事不知哀

涕之集也

冀北當年浩莫分斯人一顧每空羣國家科第與風漢
天下英雄惟使君後進何人知大老橫流無地寄斯文
自憐衰鈍辜真賞猶竊虛名海內聞

東堂睡起

置身事外息吾黥獨卧空堂一榻橫簷影漸移知日轉
樹梢微動覺風生每從山寺聞經帙間就園公辨藥名
若論胸中淡無事八珍何得望藜羹

五鼓起坐待旦

睡覺初聞雞一鳴披衣危坐待窓明
殘軀已向閑中老癡夢猶尋熟處行
南北迢迢悲往事古今莽莽歎浮生
伯倫一鍾君休笑冢象祁連亦已平

遣興

湖海元為汗漫游誤恩四領幔亭秋
掃空薄祿始無媿閉上衡門那得愁
湯嫩雪濤翻茗椀火溫香縷上衣篝
牀頭亦有閒書卷信手拈來倦即休

書齋壁

平生憂患苦縈纏菱刺磨成茨實園

俗謂因折多者謂菱角磨作雞頭

天下不知誰竟是古來惟有醉差賢過堂未悟鐘將響
晚柱寧知壁偶全自笑為農行沒世尚知驚雁落空弦

無酒歎

不用塞黃河不用出周鼎但願酒滿家日夜醉不醒不
用冠如箕不用印如斗但願身强健朝暮常飲酒造物
不少怨虐戲逐段新坐令古銅槥經月常生塵平生得

酒狂無敵百幅淋漓風雨疾造物欲以醒困之此老醒
狂君未知

舟中作

沙路時晴雨漁舟日往來村村皆畫本處處有詩材炊
黍孤煙晚呼牛一笛哀終身看不厭岸幘興悠哉

秋晚

木落寺樓出江平沙渚生牛羊下殘照鼓角動高城寒
至衣猶質憂多夢自驚戰塵方迭起河渭幾時清

西窓獨酌

却掃衡門歲月深，殘骸况復病交侵。
平生所學為何事，後世有人知此心。
水落枯萍黏破塊，霜高丹葉照橫林。
一樽濁酒西窓下，安得無功與共斟。

種蔬

老翁老去尚何言，除却翻書即灌園。
處處移蔬寮小雨，時時拾礫繞頽垣。
江鄉地暖根常茂，旱歲蟲生葉未繁。
四壁愈空冬祭近，更催穉子牧雞豚。

新治暖室

小堂穩暖紙窓明，低幌圍爐亦已成。
日閱藏經忘歲月，時臨閣帖雜真行。
詩才退後愁酣戰，酒量衰來喜細傾。
從此過冬那復事夜深，時聽雪來聲。

歲晚

無窮世事浩難量，歲晚沉綿卧草堂。
短褐圻圖移曲折，故書經蠹失偏傍。
賣刀擬買春耕犢，挾筴曾忘舊牧羊。
點檢生涯還自笑，菜畦殘葉帶新霜。

吳中冬蔬常茂

齋中弄筆偶書示子聿

左右琴樽靜不譁放翁新作老生涯
焚香細讀斜川集候火新烹顧渚茶
書為半酣差近古詩雖苦思未名家
一窓殘日呼愁起裊裊江城咽暮笳

新籬

新籬三面北通門藤架陰中細路分
天宇淡青成卵色水波微皺作靴紋
參差村舍穿林出縹渺漁歌隔浦聞
忽覺楚鄉來眼底欲題幽句弔湘君

村興

身老交情見孫生口數添園丁上牛米村婢博蚕鹽
秬秠堆盤白饅饠出釜甜閉門君勿謂衰病正相兼

小圃獨酌

少時裘馬競豪華豈料今為老圃家數點霏微社公雨
兩鼓聞淡女郎花詩成枕上常難記酒滿街頭却易賒
自笑邇來能用短只將獨醉作生涯

春日

方池潏潏碧波平曲徑纖纖細草生
席地幙天君但醉苦無多日是清明

雪山萬疊看不厭雪盡山青又一奇
今代江南無畫手矮牋移入放翁詩

怕見公卿嬾入城野橋孤店跨驢行
天公遣足看山願白盡髭鬚却眼明

新晴野步

吹盡浮雲旋作晴郊原高下水縱橫
煙蕪漫漫如添色

谷鳥闐闐已變聲，迨酒賤時須痛飲。得人扶處儘閒行，隔湖遙指蘭亭路。鄰叟追隨羨眼明。

夜行過一大姓家，值其樂飲，戲作

村豪聚飲自相歡，燈火歌呼鬧夜闌。醉飽要勝饑欲死，看渠也復面團團。

貧甚，賣常用酒杯作詩自戲

桃李成塵渾不數，海棠也作胭脂雨。清明未到春已空，枝上流鶯替人語。逢春日日合醉歸，莫笑典衣窮杜甫。

生時不肯澆舌本死後空持醑墳土門前三百里湖光
天與先生作醉鄉銀杯羽化不須歎多錢使人生窟郎
東園小飲


乞得殘骸老故山草亭終日對孱顏孤雲百尺起江際
幽鳥數聲鳴竹間衆死一身今獨健人忙萬物本常閒
此心欲語知誰聽賴有漁樵日往還

龜堂晚興

九日春陰一日晴回塘閒院愜幽情小魚出水圓紋見

輕燕穿簾折勢成今日揜闕真佚老向來涉世亦遺民
巡簷更有欣然處新筍初抽四五莖

宋詩鈔卷六十六



總校官庶吉士臣張能照
校對官庶吉士臣陳崇本
謄錄監生臣王詔

財團
去人

佛陀教育基金會

釋淨空